

閩陳修園著

醫西學三字

經

敦厚堂藏板

神農本草經讀卷三

閩吳航陳念祖修園甫著

男

元豹道彪古愚
元犀道照靈石

全校字

中品

乾薑氣味辛溫無毒主胸滿欬逆上氣溫中
止血出汗逐風濕痺腸澼下痢生者尤良

陳修園曰乾薑氣溫稟厥陰風木之氣若
溫而不烈則得沖和之氣而屬土也味辛
得陽明燥金之味若辛而不偏則金能生

水而轉潤矣故乾薑爲臟寒之要藥也胸
中者肺之分也肺寒則金失下降之性氣
壅於胸中而滿也滿則氣上所以欬逆上
氣之症生焉其主之者辛散溫行也中者
土也土虛則寒而此能溫之止血者以陽
虛陰必走得煖則血自歸經也出汗者辛
溫能發散也逐風濕痺者治寒邪之留于
筋骨也治腸澼下痢者除寒邪之陷于腸
胃也已上諸治皆取其雄烈之用如孟子

所謂剛大浩然之氣塞乎天地之間也生
則辛味渾全故又申言曰生者尤良卽金
匱治肺痿用甘草乾薑湯自注炮用以肺
虛不能驟受過辛之味炮之使辛味稍減
亦一時之權宜非若後世炮黑炮灰全失
薑之本性也葉天士亦謂炮黑入腎何其
陋歟

生薑氣味辛微溫無毒久服去臭氣通神明
陳修園曰凡藥氣溫屬厥陰風木大溫爲

熱屬少陰君火微溫稟春初之木氣則專
入足少陽膽經也味辛屬陽明燥金大辛
屬手大陰肺手陽明大腸微辛爲土中之
金則專入足陽明胃經也仲景桂枝湯等
生薑與大棗同用者取其辛以和肺衛得
棗之甘以養心營合之能兼調營衛也真
武湯茯苓桂枝湯用之者以辛能利肺氣
氣行則水利汗止肺爲水之上源也大小
柴胡湯用之者以其爲少陽本經之藥也

吳茱萸湯用之者以其安陽明之氣陽明
之氣以下行爲順而嘔目止矣少陰之氣
上交於陽明中土而利亦止矣凡此之類
本經雖未明言而仲景於氣味中獨悟其
神妙也久服去臭氣通神明者以臭氣爲
濁陰之氣神明爲陽氣之靈言其有扶陽
抑陰之效也今人只知其散邪發汗而不
知其有匡正止汗之功每于真武湯近效
白朮湯輒疑生薑而妄去之皆讀書死于

句下之過也又病家每遇方中有生薑則
曰素有血疾或曰曾患眼赤及喉痺等症
不敢輕服是亦自置死地也又何怨哉
葱白氣味辛平無毒作湯治傷寒寒熱中風
面目浮腫能出汗

陳修園曰葱白辛平發汗太陽爲寒水之
經寒傷於表則發熱惡寒得葱白之發汗
而解矣風爲陽邪多傷於上風勝則面目
浮腫得葱白之發汗而消矣此猶人所易

知也至於仲景通脈四逆湯面赤者加蔥
非取其引陽氣以歸根乎白通湯以之命
名者非取其葉下之白領薑附以入腎宮
急救自利無脈命在頃刻乎二方皆回陽
之神劑回陽先在固脫仲師豈反用發汗
之品學者不參透此理總屬誤人之庸醫
當歸氣味苦溫無毒主欬逆上氣溫瘧寒熱
洗洗在皮膚中婦人漏中絕子諸惡瘡瘍金
瘡煮汁飲之

參名當歸氣溫稟木氣而入肝味苦無毒
家說當歸氣溫稟木氣而入肝味苦無毒
得火味而入心其主欬逆上氣者心主血
肝藏血血枯則肝木挾心火而刑金當歸
入肝養血入心清火所以主之也肝爲風
心爲火風火爲陽陽盛則爲但熱不寒之
溫瘧而肺受風火之邪肺氣怯不能爲皮
毛之主故寒熱洗洗在皮膚中當歸能令
肝血足而風定心血足而火息則皮膚中
之寒熱可除也肝主藏血補肝卽所以止

漏也手少陰脉動甚爲有子補心卽所以
種子也瘡瘍皆屬心火血足則心火息矣
金瘡無不失血血長則金瘡瘳矣煮汁飲
之四字別言先聖大費苦心謂中焦受氣
取汁變化而赤是謂血當歸煮汁滋中焦
之汁與地黃作湯同義可知時傳炒燥土
炒反潤其自然之汁大失經旨

芎藭氣味辛溫無毒主中風入腦頭痛寒痺
筋攣緩急金瘡婦人血閉無子

陳修園曰芎藭氣溫稟春氣而入肝味辛
無毒得金味而入肺風爲陽邪而傷于上
風氣通肝肝經與督脈會于巔頂而爲病
芎藭辛溫而散邪所以主之血少不能熱
膚故生寒而爲痺血少不能養筋故筋結
而爲攣筋縱而爲緩筋縮而爲急芎藭辛
溫而活血所以主之治金瘡者以金瘡從
皮膚以傷肌肉芎藭稟陽明金氣能從肌
肉而達皮膚也婦人以血爲主血閉不通

則不生育芎藭辛溫通經而又能補血所以治血閉無子也

淫羊藿氣味辛寒無毒主陰痿絕傷莖中痛

利小便益氣力強志

羊脂拌炒

陳修園曰淫羊藿氣寒稟天冬水之氣而入腎味辛無毒得地之金味而入肺金水一藏之藥細味經文俱以補水藏為主陰者宗筋也宗筋屬於肝木木遇烈日而痿一得氣寒之羊藿卽如得甘露而挺矣絕

傷者絡脈絕而不續也金匱云絡脈者陰
精陽氣所往來也羊藿氣寒味辛具水天
之氣環轉運行而能續之也莖主莖也火
鬱于中則痛熱者清之以寒鬱者散之以
辛所以主莖中痛也小便主于膀胱必假
三焦之氣化而出三焦之火盛則孤陽不
化而爲溺短溺閉之症一得羊藿之氣寒
味辛金水相涵陰氣濡布陽得陰而化則
小便利矣肺主氣腎藏志孟夫子云夫志

氣之帥也潤肺之功歸于補腎其益氣力
強志之訓即可於孟子善養剛大之訓
悟之也第此理難與時醫道耳

葉天士云淫羊藿浸酒治偏風不遂水瀝
腰痛

荊芥氣味辛溫無毒主寒熱鼠癩瘰癧生瘡
破積聚氣下瘀血除濕瘧

〔泰〕荊芥氣溫稟木氣而入肝膽味辛無毒
得金味而入肺氣勝于味以氣爲主故所

主皆少陽相火厥陰風木之症寒熱往來
鼠瘻癰癰生瘡等症廼少陽之爲病也荆
芥辛溫以發相火之鬱則病愈矣飲食人
胃散精於肝肝不散精則氣滯而爲積聚
肝藏主血血隨氣而運行肝氣一滯則血
亦滯而爲瘀廼厥陰之爲病也荆芥辛溫
以達肝木之氣則病愈矣其除濕疸者以
疸成于濕荆芥溫而兼辛辛入肺而調水
道水道通則濕疸除矣今人炒黑則變爲

燥氣而不能達失其辛味而不能發且謂
爲產後常用之品味甚

麻黃氣味苦溫無毒主中風傷寒頭痛溫瘧
發表出汗去邪熱氣止欬逆上氣除寒熱破
癥堅積聚

去節良

陳修園曰麻黃氣溫稟春氣而入肝味苦
無毒得火味而人心心主汗肝主疎洩故
爲發汗上藥其所主皆係無汗之症太陽
症中風傷寒頭痛發熱惡寒無汗而喘宜

麻黃以發汗但熱不寒名曰溫瘧熱甚無
汗頭痛亦宜麻黃以發汗欬逆上氣爲手
太陰之寒症發熱惡寒爲足太陽之表症
亦宜麻黃以發汗卽癥堅積聚爲內病亦
係陰寒之氣凝聚于陰分之中曰積月累
而漸成得麻黃之發汗從陰出陽則癥堅
積聚自散凡此皆發汗之功也。根節古
云止汗是引止汗之藥以達于表而速效
升麻黃根節自能止汗舊解多誤